

Betico Croes ta sigui ser reconocí pa su lucha

ORANJESTAD - Ayera nos a ricibi copia di e publicacion EXITO, cu a sali dia 22 último, dedicando un artículo na Betico Croes.

Cu esaki por comprobá cu ainda algun aña despues di su morto, Betico Croes ta keda ser recordá pa e continente Americano.

E artículo aki a ser scirbí pa e periodista Roberto Argüello, cu el a titulá: "Betico Croes, el libertador de Aruba".

E ta cuminzá e artículo bisando cu Continente Americano tabata cuna di hombernan grandi cu a dedicá nan bida pa logra independencia di nan respectivo paísnan, manera p.e. Washington, Bolivar, San Martín, Martí, Hidalgo y Betico Croes.

Awe Aruba ta goza di un status aparte, ta debí na e lucha hibá pa Betico. Segun e periodista Roberto Argüello, recientemente e tabatin oportunidad pa combersa cu Sra. Glenda Croes na Miami, kende a admití cu pa Betico Croes por a logra su idealnan, su famia sigur a ser afectá. Mira p.e. con durante un manifestacion, un polis di

Corsow a tiré.

Despues di esaki, na víspera di mira su logro, esta Status Aparte Betico a haya un accidente cu te dia di awe no tin mucho claridad con el a sosodé, y cu finalmente a costa su morto, sin nunca e por a conta ta kico a pasa e dia ey.

Glenda Croes ta papia cu cariño y admiracion pa su esposo difunto, pero tambe cu masha orguyo di su jiu-nan, en especial di Glenbert Croes cu awe ta Parlamentario siguiendo pasonan di su tata. Maske su deseo tabata pa ningun di su jiunan bira político, pero cu Glenbert for di su nacemento e tabatin e strea pa ta un lider y dedicá pa sirbi esnan mas necesidad.

Roberto Argüello ta scirbi cu dia cu Betico a muri, continente Mericano a perde un di su hombernan mas grandi di e siglo aki. Argüello ta miembro di Comision Hispana di Senado Mericano.

E revista Exitó ta circulá na tur e ciudadnan grandi di Merca, pero tambe ta worde distribuí na varios otro país Latinoamericano. □